

**■ COLUMNA**

# Sulet u ensemen?

DA JOST FALETT

La dumonda vegn adina puspè. Sin plaun regiunal, chantunal, naziunal ed internaziunal essan nus confruntads cun la decisiun «sulet u ensemen». Fusiunar las 11 vischnancas en Engiadin'Ota u ir vinavant mintgina suletta? Acceptar ina lingua scritta cuminaivla per tut la Rumantschia u scriver vinavant en ils tschintg idioms? Rinforzar il turissem en Grischun cun ina taxa da turissem cuminaivla? Sa decider per mesiras communablas e ligiantas per frenar il stgaudament dal clima?

Ensemen n'è betg adina meglier. Ma tscherts problems existenzials n'èn betg da schliar sulets. La risposta è savens pli clarsche nus ans dumandain: Tge è las finamiras e co cuntanschain nus quellas?

Per la Rumantschia è la finamira clara: salvar il rumantsch per che era noss biadis e sutbiadis possian anc giudair questa lingua che ans è a tuts schi chara, a quels ch'èn per ed a quels ch'èn cunter il rumantsch grischun. Vai sulet? Il regress dal rumantsch cuntinua – la decisiun da Silvaplana dad abolir il rumantsch en l'administraziun communal è mo il davos exempel. La speranza che la discussiun da Pro idioms mainia a dapli preschientscha dal rumantsch en nossas vischnancas, en radunanza communal ed en las societads na s'è betg



accumplida. Esser cunter è pli simpel che esser per. E la decisiun da la Surselva romantscha en connex cun l'interpellaziun da Silva Semadeni a favur dal rumantsch e dal talian mussa: pli gugent nagut che ristgar da rinforzar il rg. E nus vesain adina dapli: per rinforzar il rumantsch ordvart il territori da tschep sco p. ex. per classas rumantschas giu la Bassa u er la preschientscha en las medias socialas è il rg indispensabel. La lingua taliana ha tut in'otra pusiziun: Per la Bregaglia p. ex. è tut la corrispondenza cun il chantun e cun la dretgira en talian. Quai sforza mintga departament dad emploiare persunas che san bain talian, e la gliעד giuvna è motivada dad emprendre bain la lingua per survegnir ina buna piazza – ma quai n'è betg pussaivel per nus Rumantschs cun tschintg linguas scrittas.

En Engiadin'Ota n'avain nus sin iniziativa da la pps gnanc pudì elavurar in concept co che ina vischnanca fusiunada pudess vesair or, en questa Val che è vegnida ferma sco regiun, cun lavurar ensemen. Ed

ussa, suenter la refurma dal territori, stuain nus far cun mintgina da las 11 vischnancas cunvegnas da prestaziun: per la destinaziun turistica, per il spital, per la chasa da tgira, per il traffic public, per la scola da musica, per la promozion da cultura e per la piazza aviatica. 7 x 11 cunvegnas da prestaziun damai che ils presidents communals elavuran e la radunanza communal po be pli dirgea u na. La populaziun na po betg pli discutir ils problems regiunals. Vai meglier sulet?

Er sin plaun naziunal va il trend fermamain vers «sulet». Il nazionalissem vegn rinforzà tar ed enturn nus. Il success da la AfD en Germania e da Trump en ils Stadis Unids da l'America, il Brexit e l'iniziativa da l'immigraziun da massa mussan: cun tema è votaziun pli lev da gudagnar. Igl è pli simpel dad esser cunter che dad esser per. Serrar ils egls e serrar ils cunfins, senza ponderar las consequenzas. Noss mund è daventà pitschen – oz essan nus, vulair u betg vulair, dependents da noss vischins, en dumondas linguisticas, economicas e socialas. La vischnanca na sa betg schliar suletta ils problems regiunals ed ina naziun na schlia betg suletta ils problems mundials. Cun tutta simpatia per systems pitschens e per independenza che han – al dretg lieu – lur avantatgs: dumondas existenzialas schliain nus savens be ensemen.